

## **Raport mbi veprimtarinë vjetore të investimit të Fondit të Ndërhyrjes së Jashtëzakonshme gjatë vitit 2021.**

Referuar ligjit nr. 133, datë 22.12.2016 “Për Rimëkëmbjen dhe Ndërhyrjen e Jashtëzakonshme në Banka, në Republikën e Shqipërisë, nenit 18, pika 1, të vendimit të Këshillit Mbikëqyrës të Bankës së Shqipërisë Nr.56, datë 03.10.2017 për miratimin e rregullores “Për Fondin e Ndërhyrjes së Jashtëzakonshme dhe procedurat për administrimin e tij” dhe dokumentit “Politika e administrimit të mjeteve financiare të Fondit të Ndërhyrjes së Jashtëzakonshme”, veprimtaria vjetore investuese për portofolin e mjeteve financiare të Fondit të Ndërhyrjes së Jashtëzakonshme për periudhën Janar - Dhjetor 2021 dhe gjendja e tij në fund të vitit 2021 paraqitet si vijon:

Në dhjetor të vitit 2020, Komiteti i Investimeve në zbatim të Politikës së Administrimit të Mjeteve Financiare, miratoi strategjinë vjetore të investimit të mjeteve financiare të Fondit të Ndërhyrjes së Jashtëzakonshme për vitin 2021. Gjatë vitit 2021 nuk ka pasur ndryshim të Politikës së Investimeve për FNJ. Politika e investimit vijon të ndjekë parimet e likuiditetit të lartë, rrezikut të ulët të kredisë dhe normës së lartë kthimit pas respektimit të dy parimeve të para.

Në vijim të njoftimit të Bankës së Shqipërisë për kontributin e vitit të katërt, të gjitha bankat bënë pagesën përkatëse të kontributit për këtë vit, në shumën prej 664 127 540 lekë, brenda afatit të pagesës në datën 30 prill 2021.

Mjetet financiare të disponueshme në Fondin e Ndërhyrjes së Jashtëzakonshme në fund të vitit 2021 arrijnë vlerën prej 2 716 milion lekë, duke shënuar një rritje prej 36.2% krahasuar me një vit më parë.

Arkëtimi i kontributit të vitit të katërt u krye në një periudhë kohore afërsisht një mujore. Me qëllim mbajtjen e një portofoli investimesh të diversifikuar në maturitete, Agjencia e ka shtrirë investimin e mjeteve të fondit (së bashku me kontributin e paguar) gjatë gjithë vitit. Për të mundësuar këtë, Fondi i Ndërhyrjes së Jashtëzakonshme është investuar në depozitë një javore pranë Bankës së Shqipërisë. Ky instrument i përdorur gjatë gjithë vitit ka siguruar në të njëjtën kohë të ardhura nga interesi. Niveli mesatar mujor i depozitës gjatë administrimit vjetor të fondit ka qenë 82,7 milionë lekë që llogaritet 3% e fondit në fund të 2021, duke kontribuar edhe në ruajtjen e transhit të likuiditetit.

Në mars 2021, Komiteti i Investimeve në përputhje dhe në zbatim të politikës së administrimit të mjeteve financiare të fondit, me qëllim ruajtjen e raporteve të transheve sipas monedhës, vendosi që të konvertojë përpara arkëtimit të kontributit vjetor kundërvlerën e 295 000 eurove. Portofoli në valutë, në fund të vitit, arriti vlerën prej 1,3 milion euro, që përbën rreth 5,93 % të totalit, duke respektuar kufirin e vendosur në politikën e administrimit të mjeteve financiare të FNJ, prej minimalisht 5% të portofolit. Nga ky portofol, 800 000 euro kanë qenë të investuara në obligacionin 2 vjeçar të emetuar nga Qeveria Shqiptare, ndërsa shumën prej 518 000 euro është mbajtur në llogari pranë Bankës së Shqipërisë, sepse nuk ka pasur ankande në euro të Qeverisë Shqiptare në tregun vendas gjatë 2021. Nënportofoli në valutë është i investuar vetëm në monedhën euro dhe përfshin investime të bëra vetëm në tituj të Qeverisë Shqiptare, të emetuara në euro në tregun e brendshëm.



Nënportofoli në lekë në fund të vitit 2021 është në vlerën 2 526 milion lekë dhe ka një peshë prej 94,1% kundrejt të gjithë vlerës së Fondit të Ndërhyrjes së Jashtëzakonshme.


Investimet në monedhën vendase janë bërë duke pasur parasysh shpërndarjen sipas maturiteteve në një larmi datash me qëllim evitimin e përqëndrimeve të larta të shumave në maturim. Gjatë vitit 2021 është investuar në tituj përkatësisht në muajt janar, shkurt, prill, maj, korrik, gusht, shtator dhe nëntor. Për sa i përket afateve të maturimit, gjatë vitit është investuar në tituj me afat maturimi 2, 7 dhe 10 vjeçar, si dhe bono thesari me maturim 3 mujor.

Në muajin Janar janë investuar në Obligacione me afat maturimi 10 vjeçar 400 milion lekë. Në muajt shkurt, maj gusht dhe nëntor janë investuar në bono thesari me maturim 3 mujor shumat prej 210, 215 dhe 226 milion lekë. Në muajt prill dhe korrik janë investuar në obligacione dyvjeçare respektivisht 700 dhe 100 milion lekë. Në shtator janë investuar në obligacion 7-vjeçar 100 milion lekë. Të gjitha


investimet e këtij fondi në nënportofolin në lekë janë në tituj të Qeverisë Shqiptarë dhe janë kryer në tregun primar.

Gjendja e depozitës në fund të vitit 2021 është në vlerën 400 mijë lekë. Vlera e likuiditetit të mbajtur në depozitë në dy muajt e fundit të vitit është minimale pasi është investuar më shumë në tituj, duke garantuar kthim më të lart investimi.

Në grafikët në vijim paraqitet ndarja e mjeteve financiare të Fondit gjatë vitit 2021 dhe në fund të tij, sipas instrumenteve.



Përgjatë të gjithë vitit, Agjencia është kujdesur jo vetëm për një administrim sa më efektiv të fondit, por edhe duke mbajtur në vëmendje ruajtjen e raporteve sipas transheve dhe monedhës, të përcaktuara në politikën dhe strategjinë e investimit. Vihet re, se gjatë administrimit të mjeteve financiare të Fondit të Ndërhyrjes së Jashtëzakonshme në fund të vitit 2021, në transhin e likuiditetit ka një rënie të mbajtjes së likuiditetit në depozitë dhe në llogari rrjedhëse, krahasuar me fillimin e vitit, ndërkaq vërehet rritje e investimeve në obligacione dhe bono thesari.



Transhi i likuiditetit në fund të vitit ka vlerën 289,03 milion lekë dhe ka pësuar ulje me 67% në krahasim me tremujorin e parë të vitit 2021 pasi ka një ulje të shumës së mbajtur në depozitë në Bankën e Shqipërisë, në llogari rrjedhëse dhe rritje të shumës së investuar në tituj me maturitet të mbetur mbi tre muaj.

Transhi i investimit në fund të vitit ka vlerën 2 396,60 milion lekë dhe ka pësuar një rritje prej 88.9% krahasuar me tremujorin e parë të vitit, pasi janë rritur ndjeshëm si investimet me maturitet të mbetur deri në 2 vjet ashtu edhe investimet me maturitet të mbetur mbi 2 vjet.

Performanca e arritur nga administrimi i këtij fondi është e kënaqshme, ku norma vjetore e kthimit për portofolin e investuar të FNJ në mbyllje të vitit financiar 2021 është rreth 2,35%.